

1 Zu sellre Zeit is Yohannes der Daafer kumme, un hot in der Wilderniss vun Judea verkinnt: **2** Nau bessert eich! Gottes Reich schteht eich graad var der Dier. **3** Nau kummt seller, wu der Brofeet Yesaya devun schwetzt: Do is en Schtimm vumme Mann, as in der Wilderniss ausruft: Macht der Weeg zerecht fer der Har, as er darrichkumme kann! **4** Seller Yohannes hot en Rock aus Kameelhohr gewore un en Gartel aus Ledder um sei Leib. Un er hot vun Hoischrecker gelebt un vun wildem Hunnich.